

Toshkent moliya instituti huzuridagi jamoatchilik Kengashi faoliyatini tashkil etish tartibi to'g'risida NIZOM

Mazkur Nizom O'zbekiston Respublikasi Prezidentining 2018-yil 5-iyundagi "Oliy ta'lim muassasalarida ta'lim sifatini oshirish va ularning mamlakatda amalga oshirilayotgan keng kamrovli isloxotlarda faol ishtirokini ta'minlash bo'yicha kushimcha chora-tadbirlar to'g'risida" PQ-3775-son qaroriga muvofiq, institut huzuridagi jamoatchilik Kengashining (keyingi o'rinlarda Kengash deb yuritiladi) vazifalari va vakolatlari hamda uning faoliyatini tashkil etish tartibini belgilaydi.

1-bob. Umumiy qoidalar

1. Toshkent moliya instituti (keyingi o'rinlarda - institut deb yuritiladi) huzuridagi jamoatchilik Kengashi institutning jamoatchilik boshqaruvi organlaridan biri hisoblanadi.

Kengash yuridik shaxs hisoblanmaydi. Kengash o'z faoliyatini jamoatchilik asosida amalga oshiradi.

2. Kengash o'z faoliyatini O'zbekiston Respublikasi Konstitutsiyasiga va qonunlariga, O'zbekiston Respublikasi Oliy Majlisi palatalarining qarorlariga, O'zbekiston Respublikasi Prezidentining 2021-yil 24-dekabrda "Davlat oliy ta'lim muassasalarining akademik va tashkiliy-boshqaruv mustaqilligini ta'minlash bo'yicha qo'shimcha chora-tadbirlar to'g'risida"gi PQ-60-son qarori, O'zbekiston Respublikasi Prezidentining 2021-yil 24-dekabrda "Davlat oliy ta'lim muassasalariga moliyaviy mustaqillik berish chora-tadbirlari to'g'risida"gi PQ-61-son qarori va farmoyishlariga, O'zbekiston Respublikasi Vazirlar Mahkamasining qarorlari va farmoyishlariga, ushbu nizomga hamda boshqa qonun hujjatlariga muvofiq amalga oshiradi.

3. Ta'lim jarayonida samarali jamoatchilik nazoratini joriy etish orqali professor-o'qituvchilar va talabalar o'rtasidagi ijtimoiy-ma'naviy muhit sog'lomligini ta'minlash, mavjud muammolarni bartaraf etishga qaratilgan ishlar orqali institutning faoliyatini rivojlantirish, professor-o'qituvchilar o'rtasidagi sog'lom raqobatni rivojlantirish, jamoatchilik asosida amalga oshiriladigan nazorat orqali ta'lim sifati va ilmiy salohiyatning hamda ijodiy madaniyatning yangi bosqichga kutarilishiga kumaklashish Kengashning asosiy maqsadlari hisoblanadi.

4. Kengash tarkibiga institut talabalari, ota-onalar, Yoshlar ittifoqining institutdagi faollari, kadrlar buyurtmachilari, professor-o'qituvchilar hamda fuqarolik jamiyati institutlari vakillari, shuningdek institut faoliyatiga ulkan hissa qo'shib kelayotgan jismoniy va yuridik shaxslar vakillari ham kirishi mumkin.

5. Kengashning tarkibi institut Kengashida tasdiqlanadi.

6. Kengash to'g'risidagi nizom va unga kiritiladigan o'zgartirishlar hamda qo'shimchalar institut rektori tomonidan tasdiqlanadi.

2-bob. Kengashning vazifalari va vakolatlari

7. Quyidagilar Kengashning asosiy vazifalari hisoblanadi:

ta'lim sifati, professor-o'qituvchilarning bilimi va pedagogik mahorati, talabalarga yaratilgan shart-sharoitlar ustidan tizimli ravishda monitoring o'rnatish;

institutga professor-o'qituvchilar tarkibiga ishga qabul qilinayotgan nomzodlar bo'yicha tavsiyalar berish;

talabalarining murojaatlarini ko'rib chiqish, ularning pedagog kadrlar haqidagi fikrlarini to'liq o'rganish maqsadida ijtimoiy so'rovlar o'tkazish;

institutdagi ta'lim jarayonini takomillashtirish bo'yicha takliflar tayyorlash va muassasaning tegishli Kengashi muhokamasiga kiritish.

8. Kengash o'ziga yuklangan vazifalarni bajarish maqsadida:

dekanat va kafedralarda o'quv yuklamalarining me'yoriy talablar asosida, odilona taqsimot qilinishini, dars soatlari taqsimoti to'g'ri hisoblanishini o'rganadi;

professor-o'qituvchilar tomonidan o'quv mashg'ulotlari jadvaliga to'liq rioya etishi, o'quv mashg'ulotlarini ko'chirish, o'tkazmaslik, darsga kech qolish, darslarni belgilangan vaqtdan erta tugatish hollarini o'rganadi, ularning sabablarini aniqlaydi, tahlil etadi hamda tegishli tavsiyalar beradi;

oraliq va yakuniy nazoratlar hamda yakuniy davlat attestatsiyalari jarayonida jamoatchilik nazoratini amalga oshiradi;

professor-o'qituvchilar va boshqa xodimlar hamda talabalar o'rtasida sog'lom ma'naviy-axloqiy muhitning mavjudligini o'rganadi va bu muhitning bo'zilishiga olib keluvchi sabablarni tahlil etadi, zaruriy tavsiyalar beradi;

professor-o'qituvchilar va boshqa xodimlarni ijtimoiy ximoyalash va ularga mukofotlar belgilashda ijtimoiy adolat tamoyillariga rioya etilishi, mukofotlanishda shaxsning o'z xizmat vazifalarini halol va vijdonan bajarishini, jamoat ishlarida, ma'naviy-ma'rifiy tadbirlarda faol ishtirokini hisobga olinishi kabi holatlarni nazorat qiladi;

institut professor-o'qituvchilar va talabalarning faoliyati (ishdan bo'shatilishi yoki talabalar safidan chiqarilishi) bilan bog'lik bo'lgan barcha turdagi yigilishlarda ishtirok etish uchun o'z a'zolaridan vakil tayinlaydi;

talaba-yoshlarning institut hududida, yashash joylarida turli nojuya xarakterli qilmishlar, jamoat tartibiga, qonunchilikka rioya etishlarini o'rganadi, nazorat qiladi va tavsiyalar beradi;

talabalar uchun institut hududida umumiy ovqatlanish joylaridagi xizmat va taomlarning sifati va narxini o'rganadi;

ta'lim, fan va ishlab chiqarish hamkorligida olib borilayotgan ilmiy tadqiqot ishlari va ularning natijalarini tahlil qiladi va jamoatchilik nazoratini o'rnatadi;

talabalarga stipendiyalarning o'z vaqtida berilishini, stipendiyalardan noqonuniy ushlab qolish hamda turli maqsadlarda pul yigish kabi hollarining bo'lmasligini nazorat qiladi, shu bo'yicha chora-tadbirlar belgilaydi;

professor-o'qituvchilar va boshqa xodimlar hamda talabalarni ijtimoiy himoya qilish, ularga moddiy yordam ko'rsatish kabi ishlarning borishini nazorat qiladi va bu borada tavsiyalar beradi;

o'quv auditoriyalarining ahvoli, tozalik darajasi, dars o'tish sharoitlarini, auditoriyalarning kerakli anjomlar bilan ta'minlanganligini o'rganadi;

professor-o'qituvchilarni ishga qabul qilish va attestatsiyadan o'tkazish jarayonida ishtirok etish va fikr bildirish uchun o'z a'zolaridan vakil tayinlaydi;

ishga qabul qilinayotgan professor-o'qituvchining sinov uchun o'tkaziladigan ochiq darsida ishtirok etish uchun o'z a'zolaridan vakil tayinlaydi;

ishga qabul qilinayotgan nomzodlar bo'yicha o'z fikr-mulohazalari yozma ravishda bildiradi.

jismoniy va yuridik shaxslarning murojaatlarini to'liq o'rganib chiqilishi hamda ularning asoslangan holda, tulaqonli ravishda qanoatlantirilishini nazorat qiladi;

talabalarning murojaatlarini ko'rib chiqish, ularning pedagog kadrlar haqidagi fikrini to'liq o'rganish maqsadida ijtimoiy so'rovlar o'tkazishda ishtirok etadi va tavsiyaviy xulosalar beradi;

professor-o'qituvchilar tomonidan talabalar bilimni xolisona baholamaslik, ta'magirlik qilish kabi noqonuniy harakatlar sodir qilinishining oldini olish bo'yicha choralar belgilaydi, tavsiyalar beradi;

talabalarning o'quv mashg'ulotlariga qatnashishi, sababsiz dars qoldirishlar, darsga kechikish, darslardan sababsiz ketib qolish hollarining sabablarini o'rganadi, nazorat qiladi;

talabalarining fanlar bo'yicha baholashida reyting to'g'risidagi nizom talablarining bajarilishini, baholash mezonlarini, tajribali o'qituvchilarning ish uslublarini o'rganadi va targ'ib etadi;

institutda jamoatchilik nazoratini olib borish yunalishlarini belgilaydi hamda uning ijrosi bo'yicha har chorakda institut Kengashida ma'lumot beradi;

faxriylar Kengashi bilan hamkorlikda o'zoq yillar mehnat qilgan va hozirda nafaqada bo'lgan professor-o'qituvchilar va boshqa xodimlarning ahvolidan, yashash sharoitlaridan xabardor bo'lish, lozim bo'lganda moddiy yordam berish kabi ishlarning amalga oshirilishida hamkorlik qiladi;

institutda muammoli masalalar yechimini topishda o'z vakolatlari doirasida ko'maklashadi;

institut kasaba uyushmasining boshlang'ich tashkiloti yigilishlarida ishtirok etish uchun o'z a'zolaridan vakil tayinlaydi;

institut rahbariyati va Kengashiga tartibsiz, ichki tartib-qoidalar va axloq-odob normalariga rioya etmagan talabalar va xodimlarga nisbatan tegishli chora qo'llash bo'yicha taklifini kiritadi;

korrupsiya va boshqa shu kabi illatlarning oldini olishga qaratilgan profilaktik ishlarda faol ishtirok etadi, takliflar kiritadi;

kafedralar, fakultetlarning yillik hisobotlarini rektorat tomonidan ko'rib chiqishda jamoatchilik nazoratini amalga oshiradi.

Kengash amaldagi qonun hujjatlariga, o'z Nizomiga va institutning ustaviga muvofiq boshqa vakolatlarga ham ega bo'lishi mumkin.

3-bob. Kengash tarkibini shakllantirish va ishini tashkil etish tartibi

9. Kengashda ishtirok etishning ixtiyoriyligi va Kengash vakolatiga tegishli masalalarni hal etishda uning barcha a'zolarining teng huquqliligi tamoyillari asosida shakllantiriladi.

Jamoatchilik Kengashi a'zolarining soni cheklanmagan.

Kengash, qoidaga ko'ra, saylov asosida Kengash raisi, raisning o'rinbosari, kotib va a'zolaridan iborat tarkibda shakllantiriladi.

Kengash yetti kishidan kam bo'lmagan toq sondan iborat tarkibda tashkil etiladi. Kengashning tarkibi institut rektorining qarori bilan har 3 yilda tasdiqlanadi.

institutning rektori va prorektorlari lavozimiga ko'ra Kengash a'zosi hisoblanadi.

10. Institut rahbariyatining yaqin qarindoshlari Kengash a'zolari bo'lishi mumkin emas.

11. Kengash raisi va uning o'rinbosari Kengashning birinchi tashkiliy majlisida saylanadi, majlisga institutning rektori raislik qiladi.

Kengash raisi va uning o'rinbosari Kengash a'zolari orasidan saylanadi.

12. Kengash raisi Kengash zimmasiga yuklangan vazifalarning bajarilishi uchun shaxsan javobgar bo'ladi.

13. Kengash raisi:

Kengashning yillik ish rejasini tasdiqlaydi, shuningdek Kengashning yillik ish rejasi bajarilishi to'g'risidagi hisobotni Kengashga hamda institut jamoasiga taqdim etadi;

Kengash ishchi komissiyalari hisobotlari, axborotlarini eshitadi, tasdiqlaydi;

Kengash majlisi kun tartibini belgilaydi va uni chaqiradi;

Kengash qarorlarini tasdiqlaydi va ularning bajarilishi nazorat qilinishini tashkil etadi;

Kengash a'zolari urtasidagi majburiyatlarni taqsimlaydi va alohida topshiriqlarning bajarilishini nazorat qiladi hamda Kengash a'zolariga yuklangan vazifalar bajarilishi yuzasidan ularning ishini muvofiqlashtiradi;

Kengashning tarkibi, faoliyatini tashkil etishga, o'zgartirishga oid takliflar kiritadi;

davlat organlari va boshqa tashkilotlarda Kengash nomidan vakillik qiladi; Kengashning samarali ishlashini ta'minlash uchun boshqa vakolatlarni amalga oshiradi.

14. Kengash raisi lavozimi bo'yicha institut Kengashi a'zosi hisoblanadi.

15. Kengash a'zolari quyidagi huquqlarga ega:

Kengashga ko'rib chiqish uchun kiritiladigan masalalarni tayyorlashda ishtirok etish;

Kengash majlislarida hamda institut Kengashida ko'rib chiqiladigan masalalarni muhokama qilish va hal etishda qatnashish;

Kengash tomonidan tuziladigan shu'balar, komissiyalar hamda ishchi guruhlariga saylash, saylanish va rahbarlik qilish;

Kengashning faoliyatini tako'millashtirish bo'yicha takliflar kiritish;

institut professor-o'qituvchilarining yillik ish faoliyat reytingini aniqlashda hay'at a'zolari sifatida qatnashish va bu ishlarda jamoat nazoratini amalga oshirish;

Kengash tomonidan ko'rib chiqiladigan masalalar bo'yicha xulosa taqdim etish;

Kengash qarorlari bilan yuklangan boshqa vazifalarni bajarish.

16. Kengash a'zolari Kengash tarkibida o'z faoliyatini jamoatchilik asosida amalga oshiradilar.

Kengash a'zolari majlisda shaxsan qatnashishi kerak. Bunday qatnashishning imkoni bo'lmagan taqdirda Kengash a'zosi majlisning kun tartibi bo'yicha o'z fikrini Kengashga yozma ravishda taqdim etishga xaqlidir.

17. Kengash institutda samarali jamoatchilik nazoratini joriy etish, ijtimoiy-ma'naviy muhit sog'lomligini ta'minlash, ta'lim sifati va ilmiy salohiyatning hamda ijodiy madaniyatning yangi bosqichga ko'tarishga oid masalalarni o'rganish va tahlil qilish uchun shu'balar, komissiyalar hamda ishchi guruhlarini tashkil etishi mumkin. Shu'balar, komissiyalar hamda ishchi guruhlarining faoliyati va tarkibi Kengash qarori bilan tasdiqlanadi.

18. Kengash o'z ishlarini o'zi tasdiqlagan rejalar asosida amalga oshiradi va o'z majlislarini zaruriyatga ko'ra, bir yil choragida kamida bir marta o'tkazadi. Kengash raisi tomonidan uning a'zolarining yozma iltimosnomalari asosida navbatdan tashqari majlislar chaqirilishi mumkin. Iltimosnomalarda navbatdan tashqari majlisni chaqirishning sabablari va asoslari bayon qilinishi kerak.

19. Kengash majlisini Kengash raisi, u bo'lmagan taqdirda esa - Kengash raisining o'rinbosari boshqaradi.

Kengash majlisi unda Kengash a'zolarining kamida uchdan ikki qismi qatnashganda huquqiy vakolatli hisoblanadi.

Majlisni o'tkazish uchun kворum yoki rais va uning o'rinbosari bo'lmaganda Kengash majlisini o'tkazishning yangi sanasi e'lon qilinadi.

20. Kengash majlisida ko'rib chiqiladigan masalalarning xususiyatiga ko'ra, shuningdek shu'balar, komissiyalar va ishchi guruhlar tarkibida. ishlash uchun davlat organlari va boshqa tashkilotlarning rahbarlari va mutaxassislari, institutning xodimlari, boshqa jismoniy shaxslar taklif etilishi mumkin.

21. Kengash kotibi:

Kengash majlisiga barcha zarur hujjatlarning o'z vaqtida tayyorlanishini ta'minlaydi;

majlisni o'tkazish muddatlari va joyini Kengash raisi bilan kelishadi;

kun tartibi masalalari bo'yicha Kengash majlislari utkazilishini tashkil etadi;

Kengash a'zolari va taklif etilgan shaxslarni majlisning sanasi, kun tartibi loyihasi, majlisni o'tkazish vaqti va joyidan xabardor qiladi;

Kengash faoliyati uchun muhim bo'lgan tadbirlar va hujjatlar to'g'risida Kengash a'zolarini xabardor qiladi;

Kengash qarorlari bajarilishi monitoringini yuritadi;

Kengash bayonnomalarini rasmiylashtiradi va tasdiqlangan bayonnomalarni Kengash a'zolariga va boshqa manfaatdor tashkilotlarga yuboradi;

Kengash qarorlari bilan unga yuklangan boshqa vazifalarni bajaradi.

Kengash kotibi Kengash a'zosi hisoblanadi.

22. Kengash yigilishlari qoidaga ko'ra, har chorakda kamida bir martadan o'tkaziladi.

23. Kengash faoliyatini tashkiliy jihatdan ta'minlash, hujjatlarini yuritish va saqlanishini tashkil etish Yoshlar ittifoqining instigutdagi yetakchisi tomonidan amalga oshiriladi.

24.Kengash o'z faoliyatini ta'lim muassasasining rektori bilan o'zaro hamkorlikda amalga oshiradi.

25.Kengash qarorlari Kengashning majlisida ishtirok etayotgan a'zolarining oddiy ko'pchilik ovozi bilan qabul qilinadi. Ovozlar soni teng bo'lgan hollarda Kengash majlisida raislik qiluvchining ovozi hal qiluvchi ovoz hisoblanadi.

26.Qabul qilingan qarorlar oliy ta'lim muassasasining rasmiy veb-sayti va ijtimoiy tarmoqlarida joylashtirilishi va ommaviy axborot vositalarida yoritilishi mumkin.

27.Kengash bayonining asl nusxasi va unga ilova qilingan hujjatlar Kengash mas'ul kotibida saqlanadi.

28.Institutning rektori Kengash hujjatlarining saqlanishi va ularning sakllanishini ta'minlash uchun shart-sharoitlar yaratadi.

29.Kengash qabul qilingan qarorlarning bajarilishini o'z yigilishlarida muntazam ravishda ko'rib chiqadi.

4-bob. Yakuniy qoidalar

30.Kengash raisi, uning o'rinbosari, mas'ul kotibi va alohida faol a'zolari institutning budjetdan tashqari mablag'lari hisobidan o'rnatilgan tartibda rag'batlantirib boriladi.

31. Kengashni tarqatib yuborish Oliy va o'rta maxsus ta'lim vazirligi va institutning qarorlari asosida amalga oshiriladi.

32. Jamoatchilik kengashining faoliyati uning nizomiga va O'zbekiston Respublikasining qonun hujjatlariga muvofiq ekanligi institutning rahbari tomonidan nazorat qilinadi.